

四庫全書

集部

欽定四庫全書

萬首唐人絕句卷三十二

宋 洪邁 編

七言

涼風亭睡覺

裴度

飽食緩行新睡覺一甌新茗侍兒煎
脫巾斜倚繩牀坐
風送水聲來耳邊

雪中訝諸公不相訪

卷三十二
憶昨雨多泥又深，猶能携妓遠過尋。
蒲空亂雪花相似，何事居然無賞心。

春興

武元衡

楊柳陰陰細雨晴，殘花落盡見流鶯。
春風一夜吹鄉夢，夢逐春風到洛城。

酬裴起居西亭留贈

艷歌能起關山恨，紅燭偏凝寒塞情。
況是池塘風雨夜，不堪絲管盡離聲。

送張司錄赴京

江南煙雨塞鴻飛
西府文章謝掾歸
相送汀洲蘭杜晚
菱歌一曲淚沾衣

宿青陽驛

空山搖落三秋暮
螢過疎簾月露團
寂寞孤燈愁不寐
蕭蕭風竹夜窻寒

送盧起居

相如擁傳有光輝
何事闌干淚濕衣
舊府東山餘妓在

重將歌舞送君歸

送張諫議

漢庭從事五人來
白首疆場獨未回
今日送君冤斷處
寒江寥落數枝梅

題嘉陵驛

悠悠風旆繞山川
山驛空蒙雨似煙
路半嘉陵頭已白
蜀門西更上青天

送柳郎中

望鄉臺下秦人去學射山中杜魄哀落日河橋千騎別
春風寂寞旆旌回

春日偶題

山川百戰古刀州龍節來分聖主憂靜守化條無一事
春風獨上望京樓

聽歌

月上重樓絲管秋佳人夜唱古梁州滿堂誰是知音者
不惜千金與莫愁

唐昌玉藥花

琪樹年年玉藥新
洞宮長閉綵霞春
日暮落英鋪地雪
獻花無復九天人

送李侍御之鳳翔

柳暗花明池上山
高樓歌酒換離顏
他時欲寄相思字
何處黃雲是隴關

贈佳人二首

步搖金翠玉搔頭
傾國傾城勝莫愁
若逞仙姿游洛浦

定知神女謝風流

林鶯一啁四時春
蟬翼羅衣白玉人
曾逐使君歌舞地
清聲長咽翠眉顰

送魏正則擢第歸江陵

商山路接玉山深
古木蒼然晝合陰
會府登筵君最少
江城秋至肯驚心

登闔閭古城

登高遠望自傷情
柳發花開映古城
全盛已隨流水去

黃鸝空轉舊春聲

山居

身依泉壑將時背路入煙蘿得地深終歲不知城廓事
手栽松竹盡成陰

夜雨憶郭通微

桃源未去阻風塵世事悠悠又遇春雨滴閒階清夜久
焚香偏憶白雲人

送嚴秀才

灞澹別離腸已斷江山迢遞信仍稀
送君偏下臨歧淚
家在南州身未歸

春亭雪夜寄西鄰二舍人

廣庭飛雪對愁人
寒谷由來不惜春
却笑山陰乘興夜
何如今日戴家鄰

酬韋胄曹

相逢異縣蹉跎意
無復少年容易歡
桃李美人攀折盡
何如松栢四時寒

同幕府夜宴惜花二首

芳草落花明月榭
朝雲暮雨錦城春
莫愁紅艷風前散
自有青娥鏡裏人

五侯門館百花繁
紅燭搖風白雪翻
不似鳳凰池畔見
飄揚今隔上林園

訓韋曹曹登天長寺見寄

青門幾度沾襟淚
併在東林雪外峯
今日重煩相憶處
春光知遶鳳池濃

陌上暮春

青青南陌柳如絲
柳色鶯聲晚日遲
何處最傷游客思
春風三月落花時

春日偶作

飛花寂寞燕雙雙
南客衙門對楚江
惆悵管絃何處發
春風吹到讀書窗

春暮寄杜嘉興兄弟

柳色千家與萬家
輕風細雨落殘花
數枝瓊玉無由見

空掩柴扉度歲華

渡淮

暮濤凝雪長淮水
細雨飛梅五月天
行子不須愁夜泊
綠揚多處有人煙

訪裴校書不遇

梨花落盡柳花時
庭樹流鶯日過遲
幾度相思不相見
春風何處有佳期

秋原寓目

木落風高天宇曠秋原一望思悠哉邊城今足射鵰騎
連鴈嗷嗷何處來

立秋華原南館別二客

風入泥陽池館秋片雲孤鶴兩難留明朝獨向青山郭
唯有蟬聲催白頭

代佳人贈張郎中

洛陽佳麗本神仙冰雪顏容桃李年心愛阮郎留不住
獨將珠淚濕紅鈿

送嚴侍御赴黔中

武陵源在朗江東流水飛花仙洞中
莫問阮郎千古事
綠楊歸處翠霞空

使次盤豆驛望永樂縣

山川不記何年別城郭應非昔所經
欲駐征車終日望
大河雲雨晦冥冥

餞裴行軍赴朝命三首

三年同看錦城花銀燭連宵照綺霞
報國從來先意氣

臨岐不用重咨嗟

珠履三千醉不歡
玉人猶若飲冰寒
送君空有無言淚
足下關山行路難

來時聖主假光輝
心恃朝恩計日歸
誰料忽成雲雨別
獨將邊淚灑戎衣

緱山道中

秋山寂寞秋水清
寒郊木葉飛無聲
王子白雲仙去久
洛濱行客夜吹笙

歲暮送舍人使京

邊城歲盡望鄉關
身逐戎旌未得還
欲別臨歧無限淚
故園花發寄君攀

寓興

二月楊花飛滿空
飄飄十里雪如風
不知何處香醪熟
願醉潘園芳樹中

塞上春懷

東風河外五城喧
南客征袍滿淚痕
愁至獨登高處望

藹然雲樹重傷蒐

塞外月夜寄荆南熊侍御

南依劉表北劉琨征戰年年簫鼓喧雲雨一乖千萬里
長城秋月洞庭猿

秋日經潼關感寓

昔年曾逐漢征東三授兵符百戰中力保山河嗟下世
秋風牢落故營空

贈歌人

仙歌靜轉玉簫催疑是流鶯禁苑來
它日相思夢巫峽
莫教雲雨晦陽臺

鄂渚送人

雲帆渺渺巴陵渡
煙樹蒼蒼郢城江
上梅花無數發
送君南浦不勝情

和韋常侍

孤雲永日自徘徊
巖館蒼蒼遍綠苔
望苑忽驚新詔下
彩鸞歸處玉籠開

送崔舍人二首

赤墀同拜紫泥封
四牡連徵待九重
唯有白鬚張司馬
不言名利尚相從

芳郊欲別闌干淚
故國難期聚散雲
分手更逢江館暮
馬嘶猿叫不堪聞

單于罷戰却歸題善陽館

單于南過善陽關
身逐歸雲到處閒
曾是五年蓮府客
每聞戰士哭陰山

學仙難

玉殿笙歌漢帝愁
鸞龍儼駕望瀛洲
黃金化盡方士死
青天欲上無緣由

春晚聞鶯

寂寂蘭臺曉夢驚
綠林殘月思孤鶯
猶疑蜀魄千年恨
化作冤禽萬轉聲

聞嚴秘書與諸客夜會

衡門寥落歲陰窮
露濕莓苔葉厭風
聞道今宵阮家會

竹林明月七人同

聞王仲周所居牡丹花發戲贈

聞說亭花秀暮春
長安才子看須頻
花開花落無人見
借問何人是主人

酬王三八見招

王昌家直在城東
落盡林花昨夜風
多興不辭千日醉
隨君走馬向新豐

贈送

金瓶梅詞話卷三十二
麻衣如雪一枝梅笑掩微粧入夢來若到越溪逢越女
紅蓮池裏白蓮開

見郭侍郎題壁

萬里楓江偶問程青苔壁上故人名悠悠身世恨南北
一別十年空復情

郊舍寓目

晨趨禁掖暮郊園九陌蒼蒼煙露繁明月上時羣動息
雪峯高處正當門

單于曉角

蕃兒吹角漢城頭
月皎霜寒大漠秋
三奏未終天便曉
何人不起望鄉愁

汴州聞角

何處金笳月裏悲
悠悠邊客夢先知
單于城上關山曲
今日中原總解吹

送白將軍

紅燭芳筵惜夜分
歌樓管咽思難聞
早知怨別人閒在

不下青山老白雲

題李將軍林亭

落英飄藥雪紛紛啼鳥如悲霍冠軍逝水不回絃管絕
玉樓迢遞鎖浮雲

送崔總赴池州

春風絲管怨津樓三奏行人醉不留別後相思江一岸
落花飛處杜鵑愁

贈圓明上人

李德裕

遠公說易長松下龍樹雙經海藏中今日導師聞佛慧
始知前路化成空

贈奉律上人

知君學地厭多聞廣度羣生出世氛飯色不應殊寶器
樹香皆遣入禪薰

長安秋夜

內官傳詔問戎機載筆金鑾夜始歸萬戶千門皆寂寂
月中清露點朝衣

懷京國

海上東風犯雪來
臘前先拆鏡湖梅
遙思禁苑青春夜
坐待宮人畫詔回

登崖州城作

獨上高樓望帝京
鳥飛猶是半年程
青山似欲留人住
百匝千遭遶郡城

伊川晚望

桑葉初黃梨葉紅
伊川落日盡無風
漢儲何假終南客

角里先生在谷中

寄茅山孫鍊師二首

石上溪蓀發紫茸
碧山幽靄水溶溶
菖花定是無人見
春日惟應羽客逢

獨尋蘭渚翫遲暉
閒倚松窻望翠微
遙想春山明月曉
玉壇清磬步虛歸

上巳日憶江南禊事

黃河西繞郡城流
上巳應無被禊遊
為憶淶江春水色

更隨宵夢向吳洲

重到惠山二首

李紳

碧峯依舊松筠老，重得經過已白頭。
俱是海天黃葉信，兩逢霜節菊花秋。

望中白鶴憐歸翼，行處青苔恨昔遊。
還向竹窻名姓下，數行添記別離愁。

答章孝標

假金方用真金鍍，若是真金不鍍金。
十載長安得一第，

何須空腹用高心

來詩有金湯
鍍了之句

朱槿花

瘴煙長暖無霜雪
槿艷繁花滿樹紅
每歎芳菲四時厭
不知開落有春風

至潭州聞猿

昔陪天上三清客
今作端州萬里人
湘浦更聞猿夜嘯
斷腸無淚可沾巾

江亭

瘴江昏霧連天合欲作家書更斷腸今日病身悲狀候
豈能埋骨向炎荒

紅蕉花

紅蕉花樣炎方識瘴水溪邊色最深葉滿叢深殷似火
不唯燒眼更燒身

憶漢月

花開花落無時節春去春來有底憑燕子不藏雷不蟄
燭煙昏霧暗騰騰

端州江亭得家書二首

雨中鵲語喧江樹風處蛛絲颺水潄開拆遠書何事喜
數行家信抵千金

長安別日春風早嶺外今來白露秋莫道淮南悲木葉
不聞搖落更堪愁

聞猿

見說三聲巴峽深此時行者盡沾襟端州江口連雲處
始信哀猿傷客心

贈韋金吾

自報金吾主禁兵
腰間寶劍重橫行
接輿也是狂歌客
更就將軍乞一聲

長門怨

劉阜亦有

宮殿沉沉曉欲分
昭陽更漏不堪聞
珊瑚枕上千行淚
不是思君是恨君

宿昭應

此是顧況詩

武帝祈靈太一壇
新豐樹色繞千官
那知今夜長生殿

獨閉空山月影寒

龜山寺魚池

汲水添池活白蓮
十年鬢鬣盡生天
凡庸不識慈悲意
自葬江魚入九泉

却望無錫芙蓉湖五首

水寬山遠煙嵐迴
柳岸縈回在碧流
清晝不風鳬鴈少
却疑初夢鏡湖秋

丹橘村邊燭火微
碧波明處鴈初飛
蕭條落日垂楊岸

隔水寥寥聞搗衣

逐波雲采參差遠背日嵐光隱見深
猶似望中連海樹月生湖上是山陰

舊山認得煙嵐近湖水平鋪碧岫間
喜見雲泉還悵望自慙山叟不歸山

翠崖幽谷分明處倦鳥歸雲在眼前
惆悵白頭為四老遠隨塵土去伊川

柳

陶令門前胃接離亞夫營裏拂朱旗人事推移無舊物
年年春至綠垂絲

題惠照寺二首

王播

三十年前此院游木蘭花發院新修如今再到經行處
樹老無花僧白頭

上堂已了各西東慙愧闍梨飯後鐘三十年來塵撲面
如今始得碧紗籠

題李處士山居

楊嗣復

卧龍決起為時君寂寞康廬唯白雲今日仲容修故業
草堂焉敢更移文

謝寄新茶

石上生牙二月中蒙山顧渚莫爭雄封題寄與楊司馬
應為前銜是相公

詠架上鷹

崔鉉

天邊心膽架頭身欲擬飛騰未有因萬里碧霄終一去
不知誰是解條人

待漏院吟

劉鄴

玉堂簾外獨遲遲
明月初沉勘契時
閒聽景陽鐘盡後
兩鶯飛上萬年枝

萬首唐人絕句卷三十二

欽定四庫全書

萬首唐人絕句卷三十三

宋 洪邁 編

七言

夜巖謠

施肩吾

夜上幽巖踏靈草松枝已踈桂枝老
新詩幾度惜不吟
此處一聲風月好

島夷行

腥臊海邊多魑市島夷居處無鄉里黑皮年少學採珠
手把生犀照鹹水

帝宮詞

自得君王寵愛時敢言春色上寒枝十年宮裏無人問
一日承恩天下知

歎花詞

前日滿林紅錦遍今日遶林看不見空餘古岸泥土中
零落燕脂兩三片

杜鵑花詞

杜鵑花時天艷然所恨帝城人不識
丁寧莫遣春風吹
留與佳人比顏色

曉光詞

日輪浮動羲和推東方一軋
天門開風神為我掃煙霧
四海蕩蕩無塵埃

望曉詞

攬衣起兮望秋河濛濛
遠霧飛輕羅
蟠桃樹上日欲出

白榆枝畔星無多

海邊遠望

扶桑枝邊紅皎皎
天雞一聲四溟曉
偶看仙女上青天
鸞鶴無多采雲少

聽南僧說偈詞

師子坐中香已發
西方佛偈南僧說
惠風吹盡六條塵
清淨水中初見月

春日美新綠詞

前日萌芽小於粟今朝草樹色已足天公不語能運為
驅遣羲和染新綠

對月憶嵩陽故人

團團月光照西壁嵩陽故人千里隔不知三十六峯前
定為何處峯前客

贈莎地道士

莎地陰森古蓮葉游龜暗老青苔甲池邊道士誇眼明
夜取蟪螟摘蚊睫

效古詞二首

莫愁得新年十六如蛾雙眉長帶綠初學篋篋四五人
莫愁獨自聲前足

姊妹無多兄弟少舉家鍾念年最小有時繞樹山鵲飛
貪看不待畫眉了

冬日觀早朝

紫煙捧日爐香動萬馬千車踏新凍繡衣年少朝欲歸
美人猶在青樓夢

觀吳偃畫松

君有絕藝終身寶
方寸巧心通萬造
忽然寫出澗底松
筆下看看一枝老

題山僧水閣

山房水閣連空翠
沉沉下有蛟龍睡
老僧趺坐入定時
不知花落黃金地

登峴亭懷孟生

峴山自高水自綠
後輩詞人心眼俗
鹿門才子不再生

怪景幽奇無管屬

吳中代蜀客吟

身狎吳兒家在蜀春深屢唱思鄉曲峨眉風景無主人
錦江悠悠為誰綠

戲詠榆莢

風吹榆錢落如雨繞林繞屋來不住知爾不堪還酒家
漫教夷甫無行處

寄李補闕

蒼生應怪君起遲
蒲輪重輟嵩陽道
功成名遂來不來
三十六巢仙鶴老

貧客吟

檻毯蔽衣無處結
寸心耿耿如刀切
今朝欲泣泉客珠
及到盤中却成血

誚山中叟

老人今年八十幾
口中零落殘牙齒
天陰偃僂帶嗽行
猶向巖前種松子

憶四明山泉

愛彼山中石泉水幽聲夜落虛窻裏至今憶得卧雲時
猶自涓涓在人耳

聞山中步虛聲

何人步虛南峯頂鶴唳九天霜月冷仙詞偶逐東風來
誤飄數聲落塵境

題龍池山人

主人家在龍池側水中有魚不敢食終朝采藥供仙厨

却笑桃花少顏色

翫新桃花

幾歎紅桃開未得
忽驚造化新裝飾
一種同霑榮盛時
偏荷清光借顏色

山石榴花

深色燕脂碎
剪紅巧能攢合
是天公莫言無物堪相比
妖艷西施春驛中

翫友人庭竹

曾去玄洲看種玉那似居家滿庭竹客來不用呼清風
此處挂冠涼自足

秋夜山居二首

幽居正想食霞客夜久月寒珠露滴千年獨鶴兩三聲
飛下巖前一枝栢

去鴈聲遙人語絕誰家素機織新雪秋山野客醉醒時
百尺老松銜半月

秋夜山中別友人

獨鶴孤雲兩難說
明朝又作東西別
知君少壯無十年
莫愛閒吟老松月

贈別王鍊師往羅浮

道俗駢闐留不住
羅浮山上有心期
却愁仙處人難到
別後音書寄與誰

春日食霞閣

灑水初晴物候新
食霞閣上最宜春
山花四面風吹入
為我鋪牀作錦茵

喜友再相逢

三十年前與君別可憐容色奪花紅誰知日月相催促
此度見君成老翁

候仙詞

西歸公子何時降南岳先生早晚來巡歷世間猶未遍
乞求鸞鶴且裴回

修仙詞

丹田自種留年藥玄谷長生續命芝世上漫忙兼漫走

不知求已更求誰

山中得劉秀才京書

自笑家貧客到踈
滿庭煙草不能鋤
今朝誰料三千里
忽得劉公一紙書

夏日題方師院

火天無處買清風
悶發時來入梵宮
只向方師小廊下
回看門外是樊籠

游春樂

一年三百六十日賞心那似春中物草迷曲渚花滿園
東家年少西家出

仙客歸鄉詞二首

六合八荒游未半子孫零落暫歸來井邊不認捎雲樹
多是門人在後栽

洞中日月洞中仙不筭離家是幾年出郭始知人代變
又須拋却古時錢

雲州飲席

酒腸雖滿少歡情
身在雲州望帝城
巡次合當誰改令
先須為我打還京

戲贈李主簿

官罷江南客恨遥
二年空被酒中消
不知暗數春游處
偏憶楊州第幾橋

春詞

沈亞之亦有

黃鳥啼多春日高
紅芳開盡井邊桃
美人手暖裁衣易
片片輕雲落剪刀

題景上人山門

水有青蓮沙有金老僧於此獨觀心
愁人欲寄中峯宿只恐白猿啼夜深

妓人殘粧詞

雲髻已收金鳳凰巧勻輕黛約殘粧
不知昨夜新歌響猶在誰家繞畫梁

臨水亭

只怪素亭黏黛色溪煙為我染莓苔
欲知源上春風起

看取桃花逐水來

聽范玄長吟

聲聲扣出碧琅玕能使秋猿欲叫難
詩興未窮心更遠
手垂青拂向雲看

觀葉生畫花

心竅玲瓏貌亦奇榮枯只在手中移
今朝故向霜天裏
點破繁花四五枝

洗丹沙詞

千淘萬洗紫光攢夜火熒熒照玉盤恐是麻姑殘米粒
不曾將與世人看

長安春夜吟

露盤滴時河漢微美人燈下裁春衣蟾蜍東去鵲南飛
芸香省中郎不歸

自述

篋貯靈沙日日看欲成仙法脫身難不知誰向交州去
為謝羅浮葛長官

少年行

醉騎白馬走空衢
惡少皆稱電不如
五鳳街頭新勒轡
半垂衫袖揖金吾

越中遇寒食

去歲清明雪溪口
今朝寒食鏡湖西
信知天地心不易
還有子規依舊啼

贈採藥叟

老去唯將藥裏行
無家無累一身輕
却教年少取書卷

小字燈前闕眼明

清夜憶仙宮子

夜靜門深紫洞煙
孤行獨坐憶神仙
三清宮裏月如晝
十二宮樓何處眠

江南怨

愁見橋邊荇葉新
蘭舟枕水楫生塵
從來不是無蓮采
十頃蓮塘賣與人

送絕塵子歸舊隱二首

雲水千重繞洞門，獨歸何處是桃源。
仙方不用隨身去，留與人間老子孫。

班藤為杖草為衣，萬壑千峯獨自歸。
縱令相憶誰相報，桂樹巖邊人信稀。

送裴秀才歸淮南

怪來頻起詠刀頭，楓葉枝邊一夕秋。
又向江南別才子，却將風景過揚州。

錢塘渡口

金步四
卷三十三
天塹茫茫連沃焦秦皇何事不安橋錢塘渡口無錢納
已失西興兩信潮

春日宴徐君池亭

暫憑春酒換愁顏今日應須醉始還池上有門君莫掩
從教野客見青山

山中送友人

欲折楊枝別恨生一重枝上一啼鶯亂山重疊雲相掩
君向亂山何處行

寄王少府

采松仙子徒銷日
喫菜山僧枉過生
多謝藍田王少府
人間詩酒最關情

贈女道士鄭玉華二首

玄髮新簪碧藕花
欲添肌雪餌紅沙
世間風景那堪戀
長笑劉郎漫憶家

明鏡湖中休采蓮
却師阿母學神仙
朱絲誤落青囊裏
猶是瑩篴第幾絃

寄西臺李侍御

二千餘里採瓊瑤到處傷心瓦礫堆
唯有繡衣周柱史獨將珠玉挂西臺

贈凌仙姥

阿母從天降幾時前朝唯有漢皇知
仙桃不啻三回熟飽見東方一小兒

晚春送王秀才游剡川

越山花去剡藤新才子風光不厭春
第一莫尋溪上路

可憐仙女愛迷人

馮上人院

擾擾凡情逐水流
世間多喜復多憂
一回行到馮公院
便欲令人百事休

金吾詞

行擁朱輪錦幘兒
望仙門外叱金羈
染鬚偷嫩無人覺
唯有平康小婦知

觀舞女

纏紅結紫畏風吹
婀娜初回弱柳枝
買笑未知誰是主
萬人心逐一人移

鄆縣村居

欲往村西日日慵
上山無水引高蹤
誰能求得秦皇術
為我先驅紫閣峯

酬周秀才

三展蜀牋皆郢曲
我心珍重甚瓊瑤
應緣水府龍神睡
偷得蛟人五色綃

旅次文水縣喜遇李少府

為君三日廢行程一縣官人是酒朋
共憶襄陽同醉處尚書坐上納銀觥

夏雨後題青荷蘭若

僧舍清涼竹樹新初經一雨洗諸塵
微風忽起吹蓮葉青玉盤中瀉水銀

途中逢少女

身倚西門笑向東牡丹初折一枝紅
市頭日賣千般鏡

知落誰家新匣中

山中翫白鹿

繞洞尋花日易銷
人間無路得相招
呦呦白鹿毛如雪
踏我桃花過石橋

山居樂

鸞鶴每於松下見
笙歌常向坐中聞
手持十節龍頭杖
不指虛空即指雲

襄陽曲

大堤女兒郎莫尋
三三五五結同心
清晨對鏡理容色
意欲取郎千萬金

望夫詞三首

看看北鴈又南飛
薄倖征夫久不歸
蟾子到頭無信處
凡經幾度上人衣

手熱寒燈向影頻
回文機上暗生塵
自家夫壻無消息
却恨橋頭賣卜人

何事經年斷書信
愁聞遠客說風波
西家還有望夫伴

一種淚痕兒最多

少婦游春詞

簇錦攢花鬪勝遊
萬人行處最風流
無端自向春園裏
笑摘青梅叫阿侯

折柳枝

傷見路邊楊柳春
一重折盡一重新
今年還折去年處
不送去年離別人

歸將吟

百戰放歸成老翁
餘生得出死人中
今朝授勅三回舞
兩賜青娥又拜公

惜花詞

千樹繁紅遶碧泉
正宜尊酒對芳年
明朝欲飲還來此
只怕春風却在前

拋纏頭詞

翠娥初罷繞梁詞
又見雙鬟對舞時
一抱紅羅分不足
參差裂破鳳凰兒

望騎馬郎

碧蹄新壓步初成
玉色郎君弄影行
賺殺唱歌樓上女
伊州誤作石州聲

春日錢塘雜興二首

酒姥溪頭桑嫋嫋
錢塘郭外柳毵毵
路逢鄰婦遥相問
小小如今學養蠶

西鄰年少問東鄰
柳岸花隄幾處新
昨夜雨多春水闊
隔江桃葉喚何人

翫手植松

却思毫末栽松處，青翠纔將衆草分。
今日散材遮不得，看看氣色欲凌雲。

夜笛詞

皎潔西樓月未斜，笛聲寥亮入東家。
却令燈下裁衣婦，誤剪同心一半花。

贈鄭倫吹鳳管

喃喃解語鳳凰兒，曾聽梨園竹裏吹。
誰謂五陵年少子，

還將此曲暗相隨

蜀茗詞

越碗初盛蜀茗新
薄煙輕處攪來勻
山僧問我將何比
欲道瓊漿却畏嗔

春霽

煎茶水裏花千片
候客亭中酒一樽
獨對春光還寂寞
羅浮道士忽敲門

諷山雲


閒雲生葉不生根
常被重重蔽石門
賴有風簾能掃蕩
滿山晴日照乾坤

日晚歸山詞

虎跡新逢雨後泥
無人家處洞邊溪
獨行歸客晚山裏
賴有鷓鴣臨路岐

翫花詞

今朝造化使春風
開拆西施面上紅
竟日眼前猶不足
數株昇入寸心中



萬首唐人絕句卷三十三

欽定四庫全書

集部

萬首唐人絕句卷三

四至
七

詳校官庶吉士臣柳邁祖

助教臣常循覆勘

總校官編修臣王燕緒

校對官編修臣勵守謙

謄錄監生臣何大士

欽定四庫全書

萬首唐人絕句卷三十四

宋 洪邁 編

七言

長安早春

施肩吾

報花消息是春風
未見先教何處紅
想得芳園十餘日
萬家身在畫屏中

再酬李先輩

清辭再發郢人家字字新移錦上花能使龍宮買綃女
低回不敢織輕霞

寄隱者

路絕空林無處問幽竒山水不知名松門拾得一片屐
知是高人向此行

寄四明山子

高樓只在千峯裏塵世望君那得知長憶去年風雨夜
向君窻下聽猿時

觀美人

漆點雙眸鬢繞蟬長留白雪占眉前
愛將紅袖遮嬌笑
往往偷開水上蓮

收糴詞

斜月朧朧照半牀
熒熒孤妾懶收糴
燈前再覽青銅鏡
枉挿金釵十二行

仙女詞

仙女羣中名最高
曾看王母種仙桃
手題金簡非凡筆

道是天邊玉兔毛

仙翁詞

世間無遠可為游
六合朝行夕已周
壇上夜深風雨靜
小仙乘月繫蒼虬

遇李山人

遊山遊水幾千重
二十年中一度逢
別易會難君且住
莫交青竹化為龍

同張鍊師溪行

青溪道士紫霞巾
洞裏仙家舊是隣
每見桃花逐流水
無回不憶武陵人

桃源詞二首

天天花裏千家住
總為當時隱暴秦
歸去不論無舊識
子孫今亦是他人

秦世老翁歸漢世
還同白鶴返遼城
縱令記得山川路
莫問當時州縣名

送道友遊山

欲駐如今未老形萬重山上九芝清君今若問採芝路
踏水踏雲攀杳冥

贈王屋劉道士

小有洞中長住客大羅天上後來仙出門即是尋常處
未可還它跨鶴鞭

謝自然昇仙

分明得道謝自然古來漫說尸解仙如花年少一女子
身騎白鶴遊青天

秋吟獻李舍人

腸結愁根酒不消
新驚白髮長
愁苗主司儻許題名姓
筆下看成度海橋

山中喜靜和子見訪

絕壁深溪無四鄰
每逢猿鶴即相親
小奴驚出垂藤下
山犬今朝吠一人

春日題羅處士山舍

亂疊千峯掩翠微
高人愛此自忘機
春風若掃階前地

便是山花帶錦飛

訪松嶺徐鍊師

千仞峯頭一謫仙
何時種玉已成田
開經猶在松陰裏
讀到南華第幾篇

江南織綾詞

卿卿買得越人絲
貪弄金梭懶畫眉
女伴能來看新竈
鴛鴦正欲上花枝

宿蘭若

聽鐘投宿入孤煙巖下病僧猶坐禪
獨夜客心何處是
秋雲影裏一燈然

題禪僧院

棲禪枝畔數花新
飛作瑠璃地上塵
谷鳥自啼猿自叫
不能愁得定中人

送絕粒僧

碧洞青蘿不畏深
免將飢渴累禪心
若期野客來相訪
一室無煙何處尋

早春遊曲江

芳處亦將枯槁同應緣造化未施功
羲和若擬動鑪鞴先鑄曲江千樹紅

佳人覽鏡

每坐臺前見玉容今朝不與昨朝同
良人一夜出門宿校却桃花一半紅

遇王山人

每欲尋君千萬峯豈知人世也相逢
一瓢遺却在何處

應挂天台最老松

遇醉道士

霞帔尋常帶酒眠
路旁疑是酒中仙
醉來不住人家宿
多向遠山松月邊

送人歸台州

莫驅歸騎且徘徊
更遣離情四五杯
醉後不憂迷客路
遙看瀑布識天台

贈施仙姑

縹緲吾家一女仙
冰容雖小不知年
有時頻夜看明月
心在常娥几案邊

山院觀花

初來唯見空樹枝
今朝滿院花如雪
門前為報諸少年
明日來遲不堪折

經桃花夫人廟

誰能枉駕入荒榛
隨例形相土木身
不及連山種桃樹
花開猶得識夫人

代農叟吟

且將一笑悅豐年
漸老那能日日眠
引客特來山地上
坐看秋水落紅蓮

下第春遊

羈情含蘖復含辛
淚眼看花似隔塵
天遣春風領春色
不教分付與愁人

送僧遊越

麻衣年少雪為顏
却笑孤雲未是閒
此去若逢花柳月

棲禪莫向苧蘿山

遇越州賀仲宣

君在鏡湖西畔住
四明山下莫經春
門前幾箇采蓮女
欲泊蓮舟無主人

江南積雨歎

人厭為霖水毀牀
邊生菌路成泥雨
師一日三回到
棟裏閒雲豈得棲

雲中道上作

羊馬羣中覓人道，雁門關外絕人家。
昔時聞有雲中郡，今日無雲空見沙。

同諸隱者夜登四明山

半夜尋幽上四明，手攀松桂觸雲行。
相呼已到無人境，何處玉簫吹一聲。

戲鄭申甫

年少鄭郎那解愁，春來閒卧酒家樓。
胡姬若擬邀他宿，挂却金鞭繫紫騮。

宿干越亭

琵琶洲上人行絕
干越亭中客思多
月滿秋江山冷落
不知誰問夜如何

少女詞二首

嬌羞不肯點新黃
踏過金鈿出繡牀
信物無端寄誰去
等閒裁破錦鴛鴦

同心帶裏脫金錢
買取頭花翠羽連
手執木蘭猶未慣
今朝初上采菱船

冬詞

錦繡堆中卧初起芙蓉面上粉猶殘臺前也欲梳雲髻
只怕盤龍手捻難

昭君怨

馬上徒勞別恨深總緣如玉不輸金已知賤妾無歸日
空荷君王有悔心

贈仙子

欲令雪貌帶紅芳更取金瓶瀉玉漿鳳管鶴聲來未足

懶眠秋月憶簫郎

越溪懷古

憶昔西施人未求
浣紗曾向此溪頭
一朝得侍君王側
不見玉顏空水流

秋夜中山贈別友人

何處邀君話別情
寒山木落月華清
莫愁今夜無詩思
已聽秋猿第一聲

大堤新詠

行路少年知不知襄陽全欠舊來時
宜城賈客載錢出始覺大堤無女兒

宿四明山

黎洲老人命余宿杳然高頂浮雲平
下視不知幾千仞欲曉不曉天雞聲

禁中新柳

萬條金線帶春煙深染青絲不直錢
又免生當離別地宮鴟啼處禁門前

酬張明府

潘令新詩忽寄來，分明繡段對花開。
此時欲醉紅樓裏，正被歌人勸一杯。

酬施先輩

孟簡

襄陽才子得聲多，四海皆傳古鏡歌。
樂府正聲三百首，梨園新入教青娥。

商山祠堂即事

竇常

奪嫡心萌事可憂，四賢西笑暫安劉。
後王不敢論珪組。

土偶人前枳樹秋

七夕

露盤花水望三星
髣髴虛無為降靈
斜漢沒時人不寐
幾條蛛網下風庭

過宋氏五女舊居

謝廷風韻婕妤才
天縱斯文去不回
一宅柳花今似雪
鄉人擬築望仙臺

杏山館聽子規

楚塞餘春聽漸稀
斷猿今夕讓霑衣
雲埋老樹空山裏
髣髴千聲一度飛

奉酬楊侍郎

竇牟

翠羽雕蟲日日新
翰林工部欲何神
自悲由瑟無彈處
今作關西門下人

杏園渡

衛郊多壘少人家
南渡天寒日又斜
君子素風悲已矣
杏園無復一枝花

奉誠園聞笛

曾絕珠纓吐錦茵
欲披荒草訪遺塵
秋風忽灑西園淚
滿目山陽笛裏人

酬舍弟庠罷舉從辟

之荆且願依劉表
折桂終慙見郤詵
舍弟未應絲作鬢
園公不用印隨身

初入諫司喜家室至

竇羣

一旦悲歡見
益光十年辛苦伴
滄浪不知筆硯緣
封事

猶問傭書日幾行

春雨

昨日偷閒看花了今朝多雨奈人何
人間盡似逢花雨
莫愛芳菲濕綺羅

送內弟素德師

南渡登舟即水仙
西垣有客思悠然
因君相問為官意
不賣毗陵負郭田

贈劉大兄院長

萬年枝下昔同趨
三事行中半已無
路自長沙急相見
共驚雙鬢別來殊

晚自臺中歸

白髮駸駸生有涯
青襟曾愛紫河車
自憐悟主難歸去
馬上看山恐到家

假日尋花

武陵緣源不可到
河陽帶縣詎堪夸
枝枝如雪南關外
一日休閒盡屬花

欽定四庫全書

卷三十四

經中年魯公廟

青史編名在篋中故林遺廟揖仁風
還將文字如顏色暫下蒲車為魯公

段都尉別業

竇庠

曾識將軍段匹碑幾場花下醉如泥
春來欲問林園主桃李無言鳥自啼

靈臺鎮

曉日天山雪半晴紅旗遙識漢家營
近來敵騎休南牧

羊馬城邊春草生

贈道芬上人

善畫松石

雲濕煙村不可闕
畫時惟有鬼神知
幾回逢著天台客
認得巖西最老枝

金山寺

一點青螺碧浪中
全依水府與天通
晴江萬里雲飛盡
鼇背參差日氣紅

冬夜寓懷寄翰林王補闕

滿地霜蕪葉下枝幾回吟斷四愁詩漢家若欲論封禪
須及相如未病時

贈符載

白社會中嘗共醉青雲路上未相逢時人莫小池中水
淺處無妨有卧龍

龍門看花

無葉無枝不見空連天撲地逕纔通山鶯驚起酒醒處
火燭燒人雪噴風

陪留守廵內至上陽宮感興二首

翠輦西歸七十春
玉堂珠綴儼埃塵
武皇弓劍埋何處
泣問上陽宮裏人

愁雲漠漠草離離
太液鉤陳處處疑
薄暮毀垣春雨裏
殘花猶發萬年枝

陝府覽房杜二公仁壽中題紀 竇鞏

仁壽元和二百年
蒙籠水墨淡如煙
當時憔悴題名日
漢祖龍潛未上天

欽定四庫全書

卷三十四

早春送宇文十

春遲不省似今年二月無花雪滿天
村店閉門何處宿夜深遙喚渡江船

經竇車騎故城

荒陂古堞欲千年名振圖書劍在泉
今日諸孫拜墳樹愧無文字續燕然

贈王氏小兒

竹林會裏偏憐小淮水清時最覺賢
莫倚兒童輕歲月

丈人曾共爾同年

唐州東途作

綠林兵起結愁雲
白羽飛書未解紛
天子欲開三面網
莫將弓箭射官軍

新羅進白鷹

御馬新騎禁苑秋
白鷹來自海東頭
漢皇無事須游獵
雪亂爭飛錦臂鞬

秋夕

護霜雲映月朦朧烏鵲爭飛井上桐夜半酒醒人不覺
滿池荷葉動秋風

襄陽寒食寄宇文籍

煙水初銷見萬家東風吹柳萬條斜大隄欲上誰相伴
馬踏春泥半是花

奉使薊門

自從身屬富人侯蟬噪槐花已四秋今日一莖新白髮
懶騎官馬到幽州

送劉禹錫

十年憔悴武陵溪，鶴病深林玉在泥。
今日太行平似砥，九霄初倚入雲梯。

送元稹西歸

南州風土滯龍媒，黃紙初飛勅字來。
二月曲江連舊宅，阿婆情熟牡丹開。

過驪山

翠輦紅旌去不回，蒼蒼宮樹鎖青苔。
有人說得當時事，

曾見長生玉殿開

洛中即事

高梧葉盡鳥巢空
洛水潺湲夕照中
寂寂天橋車馬絕
寒鴉飛入上陽宮

尋道者所隱不遇

籬外涓涓澗水流
槿花半點夕陽收
欲題名字知相訪
又恐芭蕉不奈秋

寄南游兄弟

書來未報幾時還
知在三湘五嶺間
獨立衡門秋水濶
寒鴉飛去日銜山

宮人斜

離宮路遠北原斜
生死深恩不到家
雲雨今歸何處去
黃鸝飛上野棠花

代鄰叟

年來七十罷耕桑
就暖支羸強下牀
滿眼兒孫身外事
閒梳白髮向殘陽

新營別墅寄家兄

懶性如今戒野人行藏由興不由身莫驚此度歸來晚
買得西山正值春

自京中將赴黔南

風雨荊州二月天問人初雇峽中船西南一望和雲水
猶道黔南有四千

南遊感興

傷心欲問前朝事惟見江流去不回日暮東風春草綠

鷓鴣飛上越王臺

題劒津

風前推折千年劒
巖下澄空萬古潭
雙劒變成龍化去
兩溪相並水歸南

放魚

金錢贖得免刀痕
聞道禽魚亦感恩
好去長江千萬里
不須辛苦上龍門

王仙壇

林傑

羽客已登雲路去丹爐草木盡燒殘不知千載歸何日
空使時人掃舊壇

乞巧

七夕今宵看碧霄牽牛織女渡河橋家家乞巧望秋月
穿盡紅絲幾萬條

萬首唐人絕句卷三十四

欽定四庫全書

萬首唐人絕句卷三十五

宋 洪邁 編

七言

吳苑思

陳 陶

今人地藏古人骨
古人花為今人發
江南何處葬西施
謝豹空聞采香月

古意

麻姑井邊一株杏花開不如古時紅西鄰蔡家十歲女
年年二月真東風

朝元引四首

帝燭熒煌下九天蓬萊宮曉玉爐煙無央鸞鳳隨金母
來賀薰風一萬年

正殿雲開露冕流下方朱翠壓鰲頭天雞唱罷南山曉
春色先歸十二樓

萬宇靈祥擁帝居東華元老薦屠蘇龍池遙望非煙拜

五色瞳矐在玉壺

寶祚河宮一向清
龜魚天篆益分明
近臣誰獻登封草
五岳齊呼萬歲聲

宿天竺寺

一宵何期此靈境
五天香金地
冷西僧示我高隱心
月在中峯葛洪井

古蓮塘

闔閭宮娃能采蓮
明珠作佩龍為船
三千巧笑不復見

江頭廢苑花年年

雙桂詠

青冥結根易傾倒
沃洲山中雙樹好
琉璃宮殿無斧聲
石上蕭蕭伴僧老

夏日懷

竹齋睡餘柘漿清
麟鳳誘我勞此生
忽憶天台掩書坐
澗雲起盡紅崢嶸

仙人詞二首

小山皆為十洲客
莓苔為依雙耳白
青編遺我忽隱身
暮雨虹蜺一千尺

赤城門開六丁直
曉日已燒東海色
朝天半路聞玉雞
星斗離離礙龍翼

臨風歎

芙蓉樓中飲君酒
驪駒結言春楊柳
豫章花落不見歸
一望東風堪白首

春日行

鷓鴣初鳴洲渚滿
龍蛇洗鱗春水暖
病多欲問山寺僧
湖上人傳石橋斷

春歸去

九十春光在何處
古人今人留不住
年年白眼向黔婁
唯放蟭蠸飛上樹

蜀葵詠

綠衣宛地紅倡倡
薰風似舞諸女郎
南鄰蕩子婦亡賴
錦機春夜成文章

南昌途中

古道黃緣蔓黃葛桓伊冢西春水濶村翁莫倚橫浦罾
一半魚鰕屬鶻獺

子規思

春山杜鵑來幾日夜啼南家復北家野人聽此坐惆悵
恐畏踏落東園花

吳興秋思二首

不是苕溪厭看月天涯有程雲樹涼何意汀洲剩風雨

白蘋今日似瀟湘

日夕鯢魚夢南國
荅陽水高迷渡頭
故山秋風憶歸去
白雲又被王孫留

閩川夢歸

千里潺湲建溪路
夢魂一夕西歸去
龍舫欲上巴獸灘
越王金雞報天曙

竹十首

不厭東溪綠玉君
天壇雙鳳有時聞
一峰曉似朝仙處

青節森森倚絳雲

萬枝朝露學瀟湘
杳靄孤亭白石涼
誰道乖龍不得雨
春雷入地馬鞭狂

須題內史琅玕塢
幾醉山陽瑟瑟村
剩養萬莖將掃俗
莫教凡鳥鬧雲門

一溪雲母間靈花
似到封侯逸士家
誰識雌雄九成律
子喬丹井在深涯

嘯入新篁一里行
萬竿如壘鎖龍泓
驚巢翡翠無尋處

閒倚雲根刻姓名

燕燕雛時紫米香
野溪羞色過東牆
諸兒莫拗成蹊筍
從結高籠養鳳凰

迸玉閑抽上釣磯
翠苗番次脫霞衣
山童泥乞青驄馬
騎過春泉掣手飛

一節呼龍萬里秋
數莖垂海六鼇愁
更須瀑布峯前種
雲裏闌干過子猷

丘壑誰堪話碧鮮
靜尋春譜認嬋娟
會當小殺青瑤簡

圖寫龜魚把上天

玄圃千春閉玉叢
湛陽一祖碧雲空
不須騷屑愁江島
今日南枝在國風

鍾陵秋夜

洪崖嶺上秋月明
野客枕底章江清
蓬壺宮闕不可夢
一一入樓歸鴈聲

江上逢故人

十年蓬轉金陵道
長哭青雲身不早
故鄉逢盡白頭人

清江顏色何曾老

水調詞十首

塞外迢迢未肯和五陵年少重橫戈
誰家不結空閨恨
玉筯闌干妾最多

羽管慵調怨別離西園新月伴愁眉
容華不分隨君去
獨有粧樓明鏡知

憶餞良人玉塞行梨花三見換啼鶯
邊場豈得勝閨閣
莫逞瑤弓過一生

惆悵江南早鴈飛
年年辛苦寄寒衣
征人豈不思鄉國
只是皇恩未放歸

水閣蓮開燕引雛
朝朝攀折望金吾
聞道磧西春不到
花時還憶故園無

自從清野戍遼東
舞袖香銷羅幌空
幾度長安發梅柳
節旄零落不成功

長安孤眠倦錦衾
秦樓霜月苦邊心
征衣一倍裝綿厚
猶慮交河雪凍深

瀚海長征古別離
華山歸馬是何時
仍聞萬乘尊猶屈
裝束千嬌嫁郅支

沙塞依稀落日邊
寒宵魂夢怯山川
離居漸覺笙歌懶
君逐票姚已十年

萬里輪臺音信希
傳聞移帳護金微
會須麟閣留蹤跡
不斬天驕莫議歸

送謝山人歸江夏

黃鶴春風二千里
山人佳期碧江水
攜琴一醉楊柳堤

日暮龍沙白雲起

閒居雜興五首

虞韶九奏音猶在只是巴童自棄遺閒卧清秋憶師曠
好風搖動古松枝

一顧成周力有餘白雲閒釣五溪魚中原莫道無麟鳳
自是皇家結網疎

長愛真人王子喬五松山月伴吹簫從他浮世悲生死
獨駕蒼麟入九霄

越里娃童錦作襦
艷歌聲壓郢中姝
無人說向張京兆
一曲江南十斛珠

雲堆西望賊連營
分閫何當舉義兵
莫道羔裘無壯節
古來成事盡書生

泉州刺桐花燕呈趙使君四首

猗猗小艷夾通衢
晴日薰風笑越姝
只是紅芳移不得
刺桐屏障滿中都

髣髴三株植世間
風光滿地赤城閑
無因秉燭看奇樹

長伴劉公醉玉山

赤帝嘗聞海上遊三千幢蓋擁炎洲今來樹似離宮色
紅翠欹斜十二樓

不勝攀折悵年華紅樹南看見海涯故國春風歸去盡
何人堪寄一枝花

投贈福建桂常侍二首

後來台席更何人都護朝天拜近臣長笑當時漢卿士
等閒恩澤畫麒麟

匝地歌鐘鎮海隅
城池鞅掌舊名都
不知珠履三千外
更許侯嬴寄食無

隴西行四首

漢主東風報太平
無人金闕議邊兵
縱饒奪得邊城塞
磧地桑麻種不生

誓掃匈奴不顧身
五千貂錦喪風塵
可憐無定河邊骨
猶是春閨夢裏人

隴戍三看塞草青
樓煩新替護羌兵
同來死者傷離別

一夜孤魂哭舊營

外寇生擒未有涯
黑山營陣識龍蛇
自從貴主和親後
一半風流似漢家

荅蓮華妓

近來詩思清於水
老去風情薄似雲
已向升天得門戶
錦衾深愧卓文君

下第寄友

林寬

詩人道僻命多奇
更值干戈亂起時
莫作江陵王少府

一生吟苦竟誰知

華清宮

殿角鐘殘立宿鴉
朝元歸駕望無涯
香泉空浸宮前草
未到春時爭發花

終南山

標奇聳峻壯長安
影入千門萬戶寒
徒自倚天生氣色
塵中誰為舉頭看

歌風臺

萬棘空存百尺基
酒酣曾唱大風詞
莫言馬上得天下
自古英雄盡解詩

長安遣懷

醉上高樓醒後登
任從浮薄笑才能
青龍寺裏山門上
立為南山不為僧

聞鴈

接影橫空背雪飛
聲聲寒出玉關遲
上陽宮裏三千夢
月冷風清聞過時

贈竇牟

楊憑

直用天才衆却瞋應欺李杜久為塵南荒不死中華老
別玉翻同西國人

千葉桃花

千葉桃花勝百花孤榮春晚駐年華若教避俗秦人見
知向河源舊侶誇

春中汎舟

仙郎歸奏過湘東正值三湘二月中惆悵滿川桃杏醉

醉看還與曲江同

雨中怨秋

辭家遠客愴秋風
千里寒雲與斷蓬
日暮隔山投古寺
鐘聲何處雨濛濛

秋日獨遊曲江

信馬閒過憶所親
秋山行盡路無塵
主人莫惜松陰醉
還有千錢沽酒人

寄別

晚煙洲霧共蒼蒼
河鴈驚飛不作行
回旆轉舟行數里
歌聲猶自逐清湘

邊情

新種如今屢請和
玉關邊上幸無他
欲知北海苦辛處
看取節毛餘幾多

早發湘中

按節鳴笳中貴催
紅旌白旆滿船開
迎愁湓浦登城望
西見荆門積水來

海榴

海榴殷色透簾籠
看盛看衰意欲同
若許三英隨五馬
便將濃艷鬪繁紅

春情

暮雨朝雲幾日歸
如絲如霧濕人衣
三湘二月春光早
莫逐狂風掠亂飛

送客往荊州

巴丘過日暮登城
雲水湘東一色平
若愛春秋繁露學

正逢元凱鎮南荆

戲贈馬鍊師

心嫌碧落更何從
月破花冠冰雪容
行雨若迷歸路處
近前唯見祝融峯

湘江泛舟

湘川洛浦三千里
地角天涯南北遙
除却同傾百壺外
不愁誰奈兩魂消

送別

江岸梅花雪不如看君驛馭向南都
相聞不必因來鴈
雲裏飛難落素書

唐昌觀玉藥花

楊凝

瑤華瓊藥種何年
蕭史秦嬴向紫煙
時控綵鸞過舊邸
摘花持獻玉皇前

別李協

江邊日暮不勝愁
送客霑衣江上樓
明月峽添明月照
蛾眉峯似兩眉愁

初次巴陵

西江兩接洞庭波，積水遙連天上河。
鄉信為憑誰寄去，汀洲燕鴈漸來多。

上巳

帝京元已足繁華，細管清絃七貴家。
此日風光誰不共，紛紛皆是掖垣花。

春怨

花滿簾櫳欲度春，此時夫婿在咸秦。
綠窗孤寢難成寐。

紫燕雙飛似弄人

送客歸常州

行到河邊從此辭
寒天日遠暮帆遲
可憐芳草成衰草
公子歸時過綠時

送別

春愁不盡別愁來
舊淚猶長新淚催
相思儻寄相思子
君別揚州揚子回

送客入蜀

劍閣迢迢夢想間行人歸路遠梁山明朝騎馬搖鞭去
秋雨槐花子午間

送別

仙花笑盡石門中石室重重掩綠空
暫下雲峯能幾日却回煙駕馭春風

殘花

五馬踟躕在路歧南來只為看花枝
鶯銜蝶弄紅芳盡此日深閨那得知

戲贈友人

湘陰直與地陰連
此日相逢憶醉年
美酒非如平樂貴
十升不用一千錢

即事寄人

楊凌

中禁鳴鐘日欲高
北窗歌枕望頻搔
相思寂寞青苔合
唯有春風啼伯勞

早春雪中

新年雨雪少晴時
屢失尋梅看柳期
鄉信憶隨回鴈早

江春寒帶故陰遲

北行留別

日日山川烽火頻
三河重起舊煙塵
一生孤負龍泉劍
羞把詩書問故人

秋原晚望

客鴈秋來次第逢
家書頻寄兩三封
夕陽天外雲歸盡
亂見青山無數峯

春霽花萼樓南聞宮鶯

祥煙瑞氣曉來輕
柳變花開共作晴
黃鳥遠啼鵲觀
春風流出鳳凰城

明妃曲

漢國明妃去不還
馬馱絃管向陰山
匣中雖有菱花鏡
羞對單于照舊顏

後魏行

王 穀

力微皇帝謗天嗣
太武凶殘人所畏
一朝鞬韉飛上天
子孫盡作河魚餌

東都望幸

章碣

懶修珠翠上高臺
眉月連娟恨不開
縱使東巡也無益
君王自領美人來

焚書坑

竹帛煙銷帝業虛
關河空鎖祖龍居
坑灰未冷山東亂
劉項元來不讀書

萬首唐人絕句卷三十五